

山西通志卷第一百十三

山西巡撫都察院右副都御史臣覺羅石麟奉

旨修輯

人物十三

潞安府

金

宋楫長子人天德年擢第除著作郎母老乞歸養後官至孟州防禦使子元吉元圭相繼登進士胥有名於時元吉爲兵部員外郎

元

宋子貞字周臣潞州長子人早好學工詞賦與族兄知柔同補金太學生有名稱大小宋後東平嚴實用爲詳議官兼

提舉學校汴梁下饑民北徙多方賑救全活者以萬計金
流寓士悉引見薦用拔名儒張特立劉肅李昶輩於羈旅
間士聞風而至故東平一時人材盛於他鎮七年爲行臺
右司郎中東平統五十餘城子貞倣前代觀察採訪制命
官分三道糾舉官吏立程式定期會大小始有紀綱將弁
占部曲戶謂之脚寨擅賦役幾四百所令悉歸州縣實子
忠濟復請於朝授叅議東平路事勸忠濟首新廟學延前
進士康暉王磐爲教官招生徒數百俾習經藝程試必親
臨齊魯儒風一變世祖南伐召問方畧對曰本朝威武有
餘仁德未洽所以拒命者特畏死耳若已降不殺脅從罔
治可傳檄定也世祖善其言中統初授益都路宣撫使尋
拜右三部尙書李壇反命叅議軍前行省事說史天澤曰

鹽池東來坐守孤城宜增築外城防其奔突彼糧盡援
絕當不攻自破議與天澤合事平上書陳便宜曰官爵人
主之柄選法宜盡歸吏部律令國之紀綱宜早行刊定監
司總統一路用非其才不厭人望乞選公廉有才德者爲
之州縣官相傳以世非法賦斂民窮無告宜遷轉以革其
弊又請建國學教胄子敕州郡提學課試諸生三年一貢
舉至元二年與左丞相耶律鑄行省山東還授翰林學士
叅議中書省事言朝省之事不宜數行數改刑部尚書嚴
忠範年少宜選老於刑名者代之又請改北京行省爲宣
慰司控制東北州郡頒俸祿定職田並從之拜中書平章
政事帝悔用子貞晚及以老求退帝曰卿氣力未衰勉措
置大事俟百司差有條理聽卿自便三年十一月懇辭乃

得請敕中書大政卽其家訪問子貞每聞朝廷事不便必封疏上奏卒年八十一

任志潞州人木華黎畧地至潞志首迎附充元帥收輯山寨每與金兵戰輒勝金擒其長子如山招之曰降則子生否則死志曰我爲大朝帥豈愛一子親射其子殪之木華黎嘗召志議事道經武安其縣已反志死之子存襲元帥金將武仙攻潞州存亦戰死詔有司廩給其妻孥仍賜第居之世爲潞州長官

劉宣字伯宣潞人金末徙太原幼喜讀書慨然有澄清志宣撫使張德輝器重之薦爲中書省掾暇則往從祭酒許衡講明理學初爲河北河南道勸農副使至元中以丞相安童薦超拜吏部尙書世祖將伐交趾宣上言曰連年日本

之役百姓愁戚官府擾攘今春始得停罷江浙軍民歡聲雷動安南小邦臣事已久歲貢未嘗愆期邊帥生事興兵彼因避竄海島使大舉無功將士傷殘今又下令再征聞者莫不恐懼自古興兵必須天時中原平土猶避盛夏交廣炎瘴之區毒氣害人甚於兵及今以七月會諸道兵於靜江比至安南病死必衆緩急遇敵何以應之又交趾無糧水路難通無車馬牛畜馱載不免陸運一夫擔米五斗往還自食外官得其半若十萬石用四十萬人止可供一二月軍糧搬載船料軍需用衆五六十萬廣西湖南調度頻數民多離散卽戶令供役亦不能辦况湖南密邇溪峒寇盜常多萬一姦人伺隙大兵一出乘虛生變雖有留後人馬疲弱衰老猝難以應若不計出萬全恐將復蹈前轍

及再征日本又上言曰近議復置征東行省再興日本之師此役不息安危繫焉唆都建伐占城海牙言平交趾三數年間湖廣江西供給船隻軍需糧運官民大擾廣東羣盜蠭興軍兵遠涉江海瘴毒之地死傷過半且交趾與我接境叢爾小邦遣親王提兵深入尚未見功唆都爲賊所殪自遺辱國况日本海洋萬里疆土濶遠非二國可比今次出師動衆履險縱不遇風可達彼岸倭國地廣徒衆衆多彼兵四集我師無援萬一不利欲發救兵其能飛渡邪隋伐高麗三次大舉數見敗北喪師百萬唐太宗以英武自負親征高麗雖取數城而還徒增追悔且高麗平壤諸地皆居陸地去中原不遠以二國之衆加之且不能克况日本僻在海隅與中國相懸萬里哉上納其言二十五年

由集賢學士除南臺御史中丞時江浙行省丞相忙古歹悍戾縱恣慮臺臣發其奸而忌宣尤甚日遣其黨赴建康伺隙臺班皆求自解惟宣屹不爲動忙古歹因羅織宣子逮繫揚州獄又令建康酒務淘金等官誣告行臺沮壞錢穀遣行省鞠狀宣及御史六人胥逮既登舟行省以軍船列兵衛驅迫之宣不勝憤遂自剄船中始宣將行時以一緘付從子自誠令勿啓及死視其書云觸怒大臣誣構成罪豈能與經斷小人交口辨訟屈膝爲容於怨家之前身爲臺臣義不受辱當自引決但不獲以身殉國爲恨且別有遺藁具言忙古歹罪狀塗注勾抹辭句難辨前治書侍御史霍肅爲敘次其文讀者悲惋宣旣死行省言罪重自殺前後構成其事郎中張斯立也延祐四年從子自持上

宣行實御史臺以聞追封彭城郡公諡忠憲

高薦上黨人父守忠元初爲千戶從攻黃州歿薦初備宿衛累官工部侍郎世祖北幸丞相阿合馬留守大都專權貪恣千戶王著等謀殺之薦馳驛以聞後遷河南等路宣慰使

李孟字道復潞州上黨人祖昌祚本州宣撫使父唐歷仕秦蜀僑居漢中孟生而敏悟七歲能文通貫經史授徒於家遠近爭從之世祖時省臺辟薦皆不就成宗初遣往陝西採訪先朝聖政備史館紀述孟討論編次以進時武仁二宗將出閣求名儒輔導有薦者曰布衣李孟有宰相才宜令爲太子師大德初武宗撫軍北方孟侍仁宗於宮中進講多所裨益及仁宗侍母居懷孟又如官山孟常單騎從

在懷州四年每進言堯舜之道惟孝弟今大兄在朔方大
母有居外之憂殿下當奉迎意旨以娛樂之則孝弟之道
皆得矣及安西王阿難答之潛謀也丞相哈刺哈孫密使
來告仁宗疑未行孟曰支子不嗣世祖典訓今太子遠在
萬里宗廟社稷危疑之秋殿下當奉大母急還都以折奸
謀固人心不則國家安危未可測仁宗猶豫未定孟復進
曰倘邪謀得成以一紙書召還則母子且不克保何論宗
社仁宗懼然乃奉母后還大都時哈刺哈孫稱病堅臥仁
宗遣孟往問計適成后使視疾孟入長揖坐前引其手診
脈衆以爲醫者不疑旣而知安西謀立有日還告曰事急
矣先發者制人後卽爲人所制左右疑懼未敢發皆曰俟
大兄至徐圖之未晚孟曰羣邪違棄祖訓欲立庶子天命

人心皆弗與殿下一入內庭則凡知君臣之義者無不爲用先清宮禁以迎大兄計之上也倘安西旣正位號縱太子至彼豈甘退就藩服如是則宗社危矣且危身以及其親非孝也遺禍難於其長非弟也得時弗爲非智也臨機不斷無勇也仗義而動事必萬全仁宗曰當以卜決之孟召卜者使以吉告筮遇乾之睽占大吉孟曰筮不違人仁宗起衆翼之上馬孟及諸臣皆步從入自延春門哈刺哈孫自東掖來就見至殿廊收首謀及同惡者悉送獄奉璽北迎武宗中外帖然仁宗監國使孟叅知政事規畫庶務羣小多不樂旣事定言於仁宗曰執政大臣當自天子親用今鑾輿在道孟未見顏色不敢冒大任固辭弗許遂逃去不知所之武宗初或讒孟當內難初定時嘗勸仁宗自

取上察其誣弗聽仁宗爲皇太子侍內宴飲半忽戚然改容上顧語曰吾弟何故不樂對曰賴天祖之靈神器有歸然成今日母子兄弟之歡者李道復之功爲多適有所思不自知其見於色耳上感其言命搜訪之得於許昌陘山召見玉德殿上指謂宰臣曰此皇祖妣命爲朕賓師者特授中書平章政事同知樞密院事仁宗初真拜平章政事孟以國事爲已任見當時賜與太廣名爵太濫風俗太僭擬每言人君之柄在刑與賞刑不足懲賞不足勸何以爲治司空司徒太尉古之三公也自大德以來封拜繁多冒濫不可計數釋老二教設官統治權抗有司撓亂政事僧道尤苦其擾並宜汰罷尋兼領國子學孟言方今老成凋謝四方儒士成材者勿限資級請擢任國學翰林諸職俾

知所激勸皆從之上欲痛剗除吏弊孟言胥吏亦有賢者在變化激厲之而已上曰卿儒者宜與此曹氣類不合而復爲長者之言卿於朕前惟舉人所長而不斥其短朕尤深服會歲旱臺臣言燮理非人孟曰燮理之責儒臣獨孟一人請避賢路上曰朕與卿相與終始自今勿復言賜爵秦國公上親授之印又圖其像敕詞臣爲贊且御書秋谷二字賜之入見必坐語移時嘗賜錢十萬貫令將作監治第孟曰臣布衣際遇非望富貴也辭不受更以樽節財用爲請上納其言罷諸營繕皇慶初請告歸葬事訖入朝慰勞甚至因屢請解政務乃命以平章政事議中書省事又三表乞還國公印始允上每與論用人之方孟曰人材所出固非一途然漢唐宋金科舉得人爲盛今欲興天下之

賢能以科舉取之猶勝於他途進者然必先德行經術而後文辭乃可得真材也上決意行之延祐改元復拜平章政事改封韓國公又堅乞致政上不得已許之英宗初鐵木迭兒以孟素不附已構之奪其前後封拜制命左遷集賢侍講學士欲因其不屑害之孟拜命欣然入院宣徽使以聞曰李孟今日供職例當賜酒上愕然曰李道復乃肯俯就集賢邪由是讒者不得入至治元年卒御史交章辨其誣詔復原官進封魏國公諡文忠孟三入中書退居一室蕭然如布衣凡獻納謀議常自毀其稿子獻官御史中丞尚氣節著述多行世

靳祥潞州人僑大名師事陵川郝溫兼善星歷金末失母母悲泣而盲祥訪得之舐其目百日復明人稱其孝劉敏行

山西通志 卷一百一十三
省燕京辟寘幕下無辜者多賴以免卒謚安靖

嘉彬字仲文潞州人父兆平金有功授平陽太原等處都達魯花赤彬累擢內臺御史糾平章阿合馬受賄事旌彬直言遷內臺治書進刑部尙書轉正議大夫僉湖廣行中書省事卒追封京兆郡侯

王利用字國賓潞人大德初爲安西興元兩路總管減職田租額站戶之役於他郡者悉除之民甚便焉有婦毒殺其夫問所從來吏教婦指爲富商所貨利用曰家富而貨毒藥豈人情哉訊之果寃

王守忠潞州人少卓犖不羈通律學至大間授隰州判官佐政有方延祐初調尹岳陽遷閩鄉陞江州路判官進絳州知州子璽中書監照磨

秦起宗字元卿上黨人僑深水曾大父當金季窺山麓爲洞
奉親以居傍窺大洞匿里中百人閉之具牛酒出待兵兵
入見親屬曰孝士也遂去里人曰秦父生我起宗生長兵
間學書無從得紙父順削柳爲簡寫授之成誦削去更書
年十七蒙古字學成辟武衛驛史御史中丞塔察兒愛其
才遷中臺史持文嚴密無所泄仁宗初轉中書史累遷太
子家令司典簿官上言東宮官屬輔導德義財賦非所治
也朝廷是之遷南臺御史建康多水微行檢災得實人以
爲神明文宗初命威順王征八番時蜀囊加台未平起宗
極言武昌重鎮當備上流之師親王不可遠去力止之及
王入見上曰八番之行非秦元卿幾爲失計後八番師還
無敢擾朝議以起宗治蜀幕府忘其名曰秦元卿上引筆

改曰起宗其眷注如此拜中臺御史劾中丞和尚不報起宗從臺官入見跪辨久之敕令起起宗不起會日暮出明日有赦起宗又奏不罪和尚無以正國法和尙服辜上曰爲御史當如是矣元會賜只孫服令得與大晏又劾閩縣卜咱耳流之嶺南盡言無諱皆見聽用有御史奏議一卷遷都漕運使上召諭遣之又爲撫州路總管供張甚盛問其費所從出小吏曰借辦於民遂亟使歸之几席僅給而已因諭衆曰我素農家安儉約庶使民化之居一歲請老以兵部尙書致仕卒謚昭肅子四鈞西臺御史鏞延徽寺經歷銓都省掾鐸蚤卒

王伯淵字嘉甫壺關人性謹恪廉靜有爲少充宿衛選歷官會福院判至治二年以母老棄職就養母歿後優游里社

日與毘季及耆老相過從怡然自得識者羨之後至元三年十二月以疾終年七十有八儒士李景文爲之志

靳克忠字唐臣潞州人通經術精吏治累官西臺御史後知河中府天歷元年鐵木兒叛從大慶關渡河克忠不從具公服坐廳事遇害贈陝西行臺叅知政事諡忠愍子文用廢擢西臺御史除福建行省叅政

靳泌字唐輔擢中書天歷間陝西大歉泌奉命載楮幣六萬以賑分給均平元統乙亥遼陽大熟泌奉符平糴計入粟八十萬斛民不擾而國用饒

李執中襄垣人登進士至順間累立豐功官至禮部尚書權執中至正間同知汴梁路均州事文學政事爲時所稱連肇襄垣人博學有文章至元間舉進士歷潞城陵川汾州